



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ ՎՃՌԱԲԵԿ ԴԱՏԱՐԱՆ

ՀՀ վերաքննիչ վարչական
դատարանի որոշում

Վարչական գործ թիվ ՎԴ/10101/05/24

Նախագահող դատավոր՝ Ա. Հարությունյան

Դատավորներ՝

Մ. Մելքումյան

Ռ. Խանդանյան

Վարչական գործ թիվ ՎԴ/10101/05/24

2026թ.

Ո Ր Ո Շ ՈՒ Մ

ՀԱՆՈՒՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

Հայաստանի Հանրապետության վճռաբեկ դատարանի վարչական պալատը
(այսուհետ՝ Վճռաբեկ դատարան) հետևյալ կազմով՝

նախագահող Հ. ԲԵԴԵՎՅԱՆ

զեկուցող Լ. ՀԱԿՈԲՅԱՆ

Ա. ԹՈՎՄԱՍՅԱՆ

Ռ. ՀԱԿՈԲՅԱՆ

Ք. ՄԿՈՅԱՆ

2026 թվականի մարտի 16-ին

գրավոր ընթացակարգով քննելով ՀՀ ՆԳՆ ոստիկանության պարեկային ծառայության վճռաբեկ բողոքը ՀՀ վերաքննիչ վարչական դատարանի 08.07.2025 թվականի որոշման դեմ՝ վարչական գործով ըստ հայցի Անդրանիկ Առաքելյանի ընդդեմ ՀՀ ՆԳՆ ոստիկանության պարեկային ծառայության (այսուհետ՝ Ծառայություն)՝ 27.06.2024 թվականի թիվ 8180422118 որոշումն անվավեր ճանաչելու պահանջի մասին,

Պ Ա Ր Չ Ե Ց

1. Գործի դատավարական նախապատմությունը.

Դիմելով դատարան՝ Անդրանիկ Առաքելյանը պահանջել է անվավեր ճանաչել Ծառայության 27.06.2024 թվականի թիվ 8180422118 որոշումը:

ՀՀ վարչական դատարանի (դատավոր՝ Լ. Սադոյան) (այսուհետ՝ Դատարան) 28.02.2025 թվականի վճռով հայցը բավարարվել է:

ՀՀ վերաքննիչ վարչական դատարանի (այսուհետ՝ Վերաքննիչ դատարան) 08.07.2025 թվականի որոշմամբ Ծառայության վերաքննիչ բողոքը մերժվել է, և Դատարանի 28.02.2025 թվականի վճիռը թողնվել է անփոփոխ:

Սույն գործով վճռաբեկ բողոք է ներկայացրել Ծառայությունը (ներկայացուցիչ՝ Արման Ստեփանյան):

Վճռաբեկ բողոքի պատասխան չի ներկայացվել:

2. Վճռաբեկ բողոքի հիմքը, հիմնավորումները և պահանջը.

Սույն վճռաբեկ բողոքը քննվում է հետևյալ հիմքի սահմաններում ներքոհիշյալ հիմնավորումներով.

Վերաքննիչ դատարանը խախտել է Վարչական իրավախախտումների վերաբերյալ ՀՀ օրենսգրքի 126-րդ հոդվածի 9-րդ մասը:

Բողոք բերած անձը նշված պնդումը պարզապես է հետևյալ փաստարկներով.

Վերաքննիչ դատարանը 08.07.2025 թվականի որոշմամբ հաշվի չի առել այն հանգամանքը, որ Վարչական իրավախախտումների վերաբերյալ ՀՀ օրենսգրքի 126-րդ հոդվածի 9-րդ մասի իրավակարգավորմամբ օրենսդիրը ոչ սթափ վիճակ է համարել նաև այն վիճակը, երբ վարորդի արյան կամ արտաշնչած օդի մեջ համապատասխան չափով մաքուր ալկոհոլի կամ արյան կամ մեզլի մեջ թմրամիջոցի կամ հոգեմետ (հոգեներգործուն) նյութի պարունակությունը հետևանք է անձի կողմից ալկոհոլային խմիչք, թմրամիջոց կամ հոգեմետ (հոգեներգործուն) նյութ օգտագործելուն ուստիկանության ծառայողի կողմից տրանսպորտային միջոցը կանգնեցնելուց կամ այդ անձին առնչվող ճանապարհատրանսպորտային պատահարից հետո՝ մինչև նրա սթափության վիճակի զննություն անցկացնելը կամ սթափության վիճակի զննություն անցնելուց նրան ազատելը:

Օրենսդիրն արգելել է ալկոհոլի օգտագործումը ճանապարհատրանսպորտային պատահարից հետո՝ մինչև վարորդի սթափության վիճակի զննություն անցկացնելը կամ մինչև սթափության վիճակի զննություն անցնելուց վերջինիս ազատելը: Վերաքննիչ դատարանի կողմից նշված կարգավորումն անտեսելը հանգեցրել է արդարադատության բուն էության խաթարմանը:

Վերոգրյալի հիման վրա՝ բողոք բերած անձը պահանջել է բեկանել Վերաքննիչ դատարանի 08.07.2025 թվականի որոշումը և գործն ուղարկել համապատասխան դատարան՝ նոր քննության:

3. Վճռաբեկ բողոքի քննության համար նշանակություն ունեցող փաստերը.

Վճռաբեկ բողոքի քննության համար էական նշանակություն ունեն հետևյալ փաստերը.

1) 16.06.2024 թվականի վարչական իրավախախտման վերաբերյալ արձանագրության համաձայն՝ Անդրանիկ Առաքելյանը ժամը 19:45-ին, ք. Վանաձոր, Մ3-ում «Մերսեդես» մակնիշի 01KX063 հաշվառման համարանիշի տրանսպորտային միջոցը վարել է ոչ սթափ վիճակում **(հատոր 1-ին, գ. թ. 44):**

2) 16.06.2024 թվականի վարչական իրավախախտման վերաբերյալ արձանագրության «Վարչական իրավախախտում կատարած անձի բացատրությունը, դիտողությունը, ստորագրությունը» դաշտում առկա է նշում, այն է՝ «*ես վթարից վախենալով գնացել եմ տուն 2 բաժակ կոնյակ եմ խմել որ սպրեսից դուրս գամ*»: «Արձանագրությանը ծանոթացա, իմ իրավունքների ու պարտականությունների մասին քաղվածքը և խախտման քննարկման վայրի ու ժամանակի վերաբերյալ ծանուցումն ստացա» դաշտում առկա է հայցվորի անուն ազգանունը և ստորագրությունը **(հատոր 1-ին, գ. թ. 44):**

3) 16.06.2024 թվականի վարորդի սթափության վիճակի գննության թիվ 00978 արձանագրության համաձայն՝ ժամը 19:11-ին Անդրանիկ Առաքելյանի արտաշնչած մեկ լիտր օդի մեջ մաքուր ալկոհոլի պարունակությունը կազմում է 0,387 միլիգրամ ալկոհոլ **(հատոր 1-ին, գ. թ. 44):**

4) 27.06.2024 թվականին կայացվել է Վարչական իրավախախտման գործով թիվ 8180422118 որոշումը, որով Անդրանիկ Առաքելյանը Վարչական իրավախախտումների վերաբերյալ ՀՀ օրենսգրքի 126-րդ հոդվածի 5-րդ մասով ենթարկվել է վարչական պատասխանատվության. գրկվել է տրանսպորտային միջոցներ վարելու իրավունքից՝ մեկ տարի ժամկետով **(հատոր 1-ին, գ. թ. 44):**

5) ՀՀ էկոնոմիկայի նախարարության «Ստանդարտացման և չափագիտության ազգային մարմին» ՓԲ ընկերության կողմից տրված թիվ 106544 ստուգաչափման վկայականի համաձայն՝ «Jupiter X/RP» տեսակի թիվ 91101037 գործարանային համարով ալկոտեստերը ստուգաչափման է ենթարկվել 10.10.2023 թվականին, որն ուժի մեջ է մինչև 04.10.2024 թվականը: Չափման տիրույթն է՝ 0.000-2.000մգ/լ:

Ստուգաչափման արդյունքների հիման վրա չափման միջոցը բավարարում է սահմանված պահանջներին **(հատոր 1-ին, գ. թ. 46):**

6) Ծառայության պետի պարտականությունները ժամանակավոր կատարողի 08.08.2024 թվականի որոշմամբ Ծառայության Վարչական իրավախախտման գործով թիվ 8180422118 որոշումը թողնվել է անփոփոխ, իսկ վարչական բողոքը՝ առանց բավարարման **(հատոր 1-ին, գ. թ. 18-19):**

4. Վճռաբեկ դատարանի պատճառաբանությունները և եզրահանգումը.

Վճռաբեկ դատարանն արձանագրում է, որ սույն գործով վճռաբեկ բողոքը վարույթ ընդունելը պայմանավորված է ՀՀ վարչական դատավարության օրենսգրքի 161-րդ հոդվածի 1-ին մասի 2-րդ կետով նախատեսված հիմքի առկայությամբ՝ նույն հոդվածի

3-րդ մասի 1-ին կետի իմաստով, այն է՝ առերևույթ առկա է մարդու իրավունքների և ազատությունների հիմնարար խախտում, քանի որ Վերաքննիչ դատարանի կողմից Վարչական իրավախախտումների վերաբերյալ ՀՀ օրենսգրքի 126-րդ հոդվածի 9-րդ մասի խախտման հետևանքով թույլ է տրվել դատական սխալ, որը խաթարել է արդարադատության բուն էությունը, և որի առկայությունը հիմնավորվում է ստորև ներկայացված պատճառաբանություններով.

Վերոգրյալով պայմանավորված՝ Վճռաբեկ դատարանն անհրաժեշտ է համարում բացահայտել Վարչական իրավախախտումների վերաբերյալ ՀՀ օրենսգրքի 126-րդ հոդվածի 9-րդ մասում կիրառված «ոչ սթափ վիճակում» ձևակերպման բովանդակությունը:

«Ճանապարհային երթևեկության անվտանգության ապահովման մասին» ՀՀ օրենքը (այսուհետ նաև՝ Օրենք) ամրագրում է հետևյալ խնդիրները՝ ճանապարհային երթևեկության անվտանգության սպառնալիքների, մասնավորապես, ճանապարհատրանսպորտային պատահարների նախականիման, դրանց ծանրության և հետևանքների նվազեցման միջոցով քաղաքացիների կյանքի, առողջության և գույքի, նրանց իրավունքների և օրինական շահերի, հասարակության և պետության շահերի պահպանումը (1-ին հոդվածի 2-րդ մաս): Այս խնդիրների լուծման համատեքստում է Օրենքի 24-րդ հոդվածի 7-րդ մասի «ա» կետով սահմանված տրանսպորտային միջոցը ոչ սթափ վիճակում վարելու արգելքը: Օրենքի 2-րդ հոդվածում «ոչ սթափ վիճակ» հասկացությունը բնորոշվում է որպես ավտոտրանսպորտային միջոցի կամ հոգեմետ նյութերի օգտագործմամբ պայմանավորված՝ մարդու ֆիզիկական և (կամ) հոգեկան վիճակ, որի դեպքում տրանսպորտային միջոց վարելն առաջացնում է վարչական պատասխանատվություն: Օրենքի 24-րդ հոդվածի 7-րդ մասի «ը» կետը վարորդին արգելում է նաև ավտոտրանսպորտային միջոցներ, հոգեմետ կամ գիտակցությունը մթազնոդ այլ միջոցներ օգտագործել ճանապարհատրանսպորտային պատահարից, որին նա առնչություն ունի, կամ ոստիկանության աշխատակցի կողմից տրանսպորտային միջոցը կանգնեցնելուց հետո՝ մինչև սթափության վիճակի զննություն անցկացնելը կամ սթափության վիճակի զննություն անցկացնելուց նրան ազատելու որոշման ընդունումը:

Օրենքով սահմանված նշված արգելքները խախտելու համար վարչական պատասխանատվությունը սահմանված է Վարչական իրավախախտումների վերաբերյալ ՀՀ օրենսգրքի (այսուհետ նաև՝ Օրենսգրք) 126-րդ հոդվածով: Նշված հոդվածը սահմանում է. «1. Տրանսպորտային միջոցները ոչ սթափ վիճակում վարելը, եթե վարորդը միայն ավտոտրանսպորտային միջոցի ազդեցության տակ է, և զանցանքը չի պարունակում սույն հոդվածի երկրորդից հինգերորդ մասերի հատկանիշները՝ առաջացնում է տուգանքի նշանակում՝ սահմանված նվազագույն աշխատավարձի քսանիննապատիկի չափով, տուգանային միավորի կիրառում՝ 5 միավոր:

1.1. Ընդհանուր օգտագործման տրանսպորտային միջոցը կամ թեթև մարդատար-տաքսի ավտոմոբիլը ոչ սթափ վիճակում վարելը, եթե վարորդը միայն ավտոտրանսպորտային միջոցի ազդեցության տակ է, և զանցանքը չի պարունակում սույն հոդվածի երկրորդից չորրորդ

մասերի հատկանիշները՝ առաջացնում է տրանսպորտային միջոցներ վարելու իրավունքից զրկում՝ վեց ամիս ժամկետով:

2. Սույն հոդվածի առաջին մասով նախատեսված արարքը կատարելը, եթե վարորդի արյան մեկ լիտրի մեջ մաքուր ալկոհոլի պարունակությունը գերազանցում է 1 գրամը կամ եթե նրա մեկ լիտր արտաշնչած օդի մեջ մաքուր ալկոհոլի պարունակությունը գերազանցում է 0.5 միլիգրամը՝ առաջացնում է տրանսպորտային միջոցներ վարելու իրավունքից զրկում՝ մեկ տարի ժամկետով:

3. Սույն հոդվածի առաջին մասով նախատեսված արարքը կատարելը, եթե վարորդի ոչ սթափ վիճակում լինելը պայմանավորված է արյան կամ մեզի մեջ թմրամիջոցի կամ հոգեմետ (հոգեներգործուն) նյութի պարունակությամբ՝ առաջացնում է տրանսպորտային միջոցներ վարելու իրավունքից զրկում՝ երկու տարի ժամկետով:

4. Սահմանված կարգին համապատասխան՝ սթափության վիճակը ստուգելու նպատակով զննություն անցնելուց խուսափելը՝ առաջացնում է տրանսպորտային միջոցներ վարելու իրավունքից զրկում՝ երկու տարի ժամկետով:

5. Սույն հոդվածի առաջին մասով նախատեսված արարքը վարչական տույժի նշանակման օրվանից հետո՝ մեկ տարվա ընթացքում, կրկին կատարելը՝ առաջացնում է տրանսպորտային միջոցներ վարելու իրավունքից զրկում՝ մեկ տարի ժամկետով:

(...)

9. Սույն օրենսգրքով նախատեսված դեպքում անձը համարվում է ոչ սթափ վիճակում գտնվող, եթե ստուգմամբ պարզվում է, որ նրա մեկ լիտր արյան մեջ մաքուր ալկոհոլի պարունակությունը 0.2 գրամից կամ մեկ լիտր արտաշնչած օդի մեջ 0.1 միլիգրամից ավելի է, կամ եթե անձի արյան կամ մեզի մեջ առկա է թմրամիջոցի կամ հոգեմետ (հոգեներգործուն) նյութի պարունակություն: Անձը համարվում է ոչ սթափ վիճակում գտնվող նաև այն դեպքում, երբ նրա արյան կամ արտաշնչած օդի մեջ սույն մասում նշված չափով մաքուր ալկոհոլի կամ արյան կամ մեզի մեջ թմրամիջոցի կամ հոգեմետ (հոգեներգործուն) նյութի պարունակությունը ոստիկանության ծառայողի կողմից տրանսպորտային միջոցը կանգնեցնելուց կամ այդ անձին առնչվող ճանապարհատրանսպորտային պատահարից հետո, բայց մինչև նրա սթափության վիճակի զննություն անցկացնելը կամ սթափության վիճակի զննություն անցնելուց նրան ազատելը, այդ անձի կողմից ալկոհոլային խմիչք, թմրամիջոց կամ հոգեմետ (հոգեներգործուն) նյութ օգտագործելու հետևանք է: (...):»:

Օրենսգրքի 126-րդ հոդվածի 1-3-րդ մասերով նախատեսված զանցակազմերի օբյեկտիվ կողմը դրսևորվում է «Ճանապարհային երթևեկության անվտանգության ապահովման մասին» ՀՀ օրենքի 24-րդ հոդվածի 7-րդ մասի «ա» և «ը» կետերի վերը նշված արգելքները խախտելու ձևով: Օրենսգրքի 126-րդ հոդվածի 4-րդ մասը, նույն արգելքների խախտման դեպքում պատասխանատվության անխուսափելիությունն ապահովելու համատեքստում վարչական պատասխանատվություն է սահմանել նաև սթափության վիճակը ստուգելու նպատակով զննություն անցնելուց խուսափելու համար:

Օրենսգրքի 126-րդ հոդվածի 1-ին մասը պատասխանատվություն է սահմանում ոչ սթափ վիճակում տրանսպորտային միջոցը վարելու համար, եթե անձը միայն ալկոհոլի

ազդեցության տակ է: Նույն հոդվածի 3-րդ մասը պատասխանատվություն է սահմանում ոչ սթափ վիճակում տրանսպորտային միջոցը վարելու համար, եթե այդ վիճակը պայմանավորված է թմրամիջոցի կամ հոգեմետ նյութի օգտագործմամբ: Օրենսգրքի 126-րդ հոդվածի 1-ին և 3-րդ մասերում կիրառված «ոչ սթափ վիճակ» հասկացության բովանդակությունը բացահայտված է նույն հոդվածի 9-րդ մասում: Վերջինիս համաձայն «ոչ սթափ վիճակը» բնորոշվում է որպես մի վիճակ, երբ.

- մեկ լիտր արյան մեջ մաքուր ալկոհոլի պարունակությունը 0.2 գրամից կամ մեկ լիտր արտաշնչած օդի մեջ 0.1 միլիգրամից ավելի է,

- անձի արյան կամ մեզի մեջ առկա է թմրամիջոցի կամ հոգեմետ (հոգեներգործուն) նյութի պարունակություն:

Որպես «ոչ սթափ վիճակ է» բնորոշվում նաև այն վիճակը, երբ արյան կամ արտաշնչած օդի մեջ ալկոհոլի նշված քանակի առկայությունը կամ արյան կամ մեզի մեջ թմրամիջոցի կամ հոգեմետ նյութի պարունակությունը արդյունք են վարորդի կողմից ալկոհոլի կամ թմրամիջոցի կամ հոգեմետ նյութի օգտագործման՝ ուստիկանության ծառայողի կողմից տրանսպորտային միջոցը կանգնեցնելու կամ այդ անձին առնչվող ճանապարհատրանսպորտային պատահարի և նրա սթափության վիճակի զննություն անցկացնելու կամ սթափության վիճակի զննություն անցնելուց նրան ազատելու միջև ընկած ժամանակահատվածում:

Օրենսգրքի 126-րդ հոդվածի 9-րդ մասում «ոչ սթափ վիճակում» հասկացության բնորոշումից բխում է, որ օրենսդիրը, հաշվի առնելով Օրենքի 24-րդ հոդվածի 7-րդ մասի «ը» կետի արգելքը, «ոչ սթափ վիճակում» հասկացության բովանդակությունը սահմանելիս տարբերակում չի կատարել, թե ստուգմամբ վարորդի մոտ հայտնաբերված ալկոհոլի, թմրամիջոցի կամ հոգեմետ նյութի տվյալ պարունակությունը արդյունք է դրանց օգտագործման՝ մինչ ուստիկանության ծառայողի կողմից տրանսպորտային միջոցը կանգնեցնելը կամ այդ անձին առնչվող ճանապարհատրանսպորտային պատահարը, թե՞ դրանից հետո՝ մինչև սթափության վիճակի զննություն անցկացնելը կամ սթափության վիճակի զննություն անցնելուց նրան ազատելը:

Օրենսդիրը վտանգավորության նույն աստիճանն է հաղորդել համապատասխան քանակությամբ ալկոհոլ, թմրամիջոց կամ հոգեմետ նյութ օգտագործելուն ինչպես մինչև ուստիկանության ծառայողի կողմից տրանսպորտային միջոցը կանգնեցնելը կամ տվյալ անձին առնչվող ճանապարհատրանսպորտային պատահարը, այնպես էլ դրանից հետո՝ մինչև վարորդի սթափության վիճակի զննություն անցկացնելը կամ սթափության վիճակի զննություն անցնելուց նրան ազատելը:

Ըստ այդմ՝ Վճռաբեկ դատարանն արձանագրում է, որ վարորդն Օրենսգրքի 126-րդ հոդվածի 1-3-րդ մասերով սահմանված վարչական պատասխանատվության ենթակա է ոչ միայն այն դեպքում, երբ համապատասխան քանակությամբ ալկոհոլ, թմրամիջոց կամ հոգեմետ նյութ օգտագործել է մինչև տրանսպորտային միջոցը ուստիկանության ծառայողի կողմից կանգնեցնելը կամ ճանապարհատրանսպորտային պատահարը, այլ նաև տրանսպորտային միջոցը կանգնեցնելու կամ ճանապարհատրանսպորտային պատահարի և սթափության վիճակի զննություն անցկացնելու միջև ընկած ժամանակահատվածում:

«Ճանապարհային երթևեկության անվտանգության ապահովման մասին» ՀՀ օրենքի 24-րդ հոդվածի 2-րդ մասի «բ» կետի 2-րդ ենթակետի համաձայն՝ տրանսպորտային միջոցի վարորդը պարտավոր է ուստիկանության ծառայողի պահանջով ոչ սթափ վիճակում գտնվելու բավարար հիմքերի առկայության դեպքում ենթարկվել համապատասխան ստուգման՝ սթափության վիճակը որոշելու համար (...):

Օրենքի 9-րդ հոդվածի «իե.3» կետի համաձայն՝ ճանապարհային երթևեկության անվտանգության ապահովման բնագավառում Հայաստանի Հանրապետության կառավարությունը սահմանում է վարորդի սթափության վիճակի գննության կարգը, այդ գննության արձանագրության, ուղեգրի, գրանցման մատյանի ձևերը:

Օրենքի 10-րդ հոդվածի 1-ին մասի «ժդ» կետի համաձայն՝ ճանապարհային երթևեկության անվտանգության ապահովման բնագավառում ՀՀ ուստիկանությունը տեխնիկական միջոցով սահմանված կարգով իրականացնում է արտաշնչած օդի մեջ մաքուր ալկոհոլի պարունակության միջոցով վարորդի սթափության վիճակի գննություն:

«Վարորդի սթափության վիճակի գննության կարգը, այդ գննության արձանագրության, ուղեգրի, գրանցման մատյանի ձևերը հաստատելու մասին» ՀՀ կառավարության 19.03.2009 թվականի թիվ 277-Ն որոշմամբ (այսուհետ՝ Թիվ 277-Ն որոշում) հաստատվել են բուժհաստատությունների կողմից վարորդի սթափության վիճակի գննության կարգը՝ համաձայն թիվ 1 հավելվածի (այսուհետ՝ Թիվ 1 հավելված), բուժհաստատությունների կողմից վարորդի սթափության վիճակի գննության արձանագրության ձևը՝ համաձայն թիվ 2 հավելվածի, ուստիկանության ծառայողի կողմից տեխնիկական միջոցով արտաշնչած օդի մեջ մաքուր ալկոհոլի պարունակության միջոցով վարորդի սթափության վիճակի գննություն (ոչ սթափ վիճակում լինելու փաստի ստուգում) իրականացնելու կարգը՝ համաձայն թիվ 4 հավելվածի (այսուհետ՝ Թիվ 4 հավելված): Միաժամանակ, նշված որոշման 1.1-ին կետով սահմանվում են արտաշնչած օդի մեջ մաքուր ալկոհոլի պարունակության միջոցով ուստիկանության ծառայողի կողմից վարորդի սթափության վիճակի գննություն (ոչ սթափ վիճակում լինելու փաստի ստուգում) իրականացնելու համար նախատեսված տեխնիկական միջոցին ներկայացվող հիմնական պահանջները:

Թիվ 1 հավելվածի 14-րդ կետի համաձայն՝ վարորդի օրգանիզմում ալկոհոլի հայտնաբերման համար գննությունն առաջին հերթին իրականացվում է վարորդի արտաշնչած օդի հետազոտության միջոցով (բացառությամբ քաղաքացու դիմումի հիման վրա իրականացվող գննության դեպքերի): Նույն հավելվածի 15-րդ կետի համաձայն՝ վարորդի գրավոր պահանջով և (կամ) իր կողմից արտաշնչված օդի նմուշներ հանձնելուց վարորդի հրաժարվելու դեպքում գննություն կարող է իրականացվել մեզի և (կամ) արյան հետազոտության միջոցով: Նույն հավելվածի 20-րդ կետի համաձայն՝ մեկ եղանակով (մեթոդով) սթափության վիճակի գննության արդյունքների հետ համաձայն չլինելու դեպքում գննվողը կարող է պահանջել, որ իր սթափության վիճակը որոշվի նաև այլ եղանակով (մեթոդով):

Թիվ 4 հավելվածի 4-րդ կետի համաձայն՝ եթե վարորդի սթափության վիճակի գննության արդյունքում պետք է կազմվի վարչական իրավախախտման վերաբերյալ

արձանագրություն, ապա տեխնիկական միջոցով կազմվում է (տպագրվում է) նաև վարորդի սթափության վիճակի զննության արձանագրություն՝ երկու օրինակից (...):

Թիվ 4 հավելվածի 8-րդ կետի համաձայն՝ եթե վարորդը խուսափում է (այդ թվում՝ հրաժարվելու միջոցով) նույն կարգին համապատասխան վարորդի սթափության վիճակի զննություն անցնելուց, ապա սթափության վիճակի զննությունն իրականացվում է նույն որոշմամբ նախատեսված բուժհաստատությունների կողմից՝ սույն որոշմամբ սահմանված կարգով, իսկ բուժհաստատությունում սթափության վիճակի զննություն անցնելուց խուսափելու (այդ թվում՝ հրաժարվելու միջոցով) դեպքում առաջանում է օրենքով սահմանված պատասխանատվություն:

Վերոհիշյալ իրավակարգավորումների վերլուծության արդյունքում Վճռաբեկ դատարանն արձանագրում է, որ վարորդի ոչ սթափ վիճակում գտնվելու փաստը հաստատող պատշաճ վերաբերելի և թույլատրելի ապացույց է Թիվ 277-Ն որոշմամբ հաստատված ձևին (համաձայն թիվ 2 հավելվածի) համապատասխան կազմված՝ բուժհաստատության կողմից վարորդի սթափության վիճակի զննության արձանագրությունը կամ նույն որոշման 1.1-ին կետով սահմանված պահանջներին համապատասխանող տեխնիկական միջոցով կազմված՝ վարորդի սթափության վիճակի զննության արձանագրությունը:

Նշված արձանագրություններն ամրագրում են վարորդի սթափության աստիճանը զննության պահի դրությամբ՝ անկախ նրանից, թե զննությամբ հայտնաբերված ալկոհոլը, թմրամիջոցը կամ հոգեմետ նյութը երբ է օգտագործվել՝ տրանսպորտային միջոցը կանգնեցնելուց կամ ճանապարհատրանսպորտային պատահարից առաջ, թե հետո: Օրենսդիրը ոչ սթափ վիճակում տրանսպորտային միջոցը վարելու զանցակազմի օբյեկտիվ կողմի պարտադիր հատկանիշ է դիտարկել վարորդի *սթափության վիճակը ստուգելու պահին* համապատասխան քանակությամբ ալկոհոլի, թմրամիջոցի կամ հոգեմետ դեղի պարունակությունը, որպիսի պայմաններում այլևս իրավական նշանակություն չունի ալկոհոլը, թմրամիջոցը կամ հոգեմետ նյութն օգտագործելու պահը: Այլ կերպ՝ եթե սթափության վիճակի զննությամբ հաստատվել է ոչ սթափ լինելու փաստը, ապա արդեն իսկ առկա է տրանսպորտային միջոցը ոչ սթափ վիճակում վարելու զանցակազմի պարտադիր հատկանիշը՝ ոչ սթափ վիճակում գտնվելու փաստը:

Ըստ այդմ՝ Վճռաբեկ դատարանն արձանագրում է, որ այն հանգամանքը, որ վարորդն ալկոհոլ, թմրամիջոց կամ հոգեմետ նյութ օգտագործել է մինչև տրանսպորտային միջոցը ոստիկանության ծառայողի կողմից կանգնեցնելը կամ ճանապարհատրանսպորտային պատահարը, թե դրանից հետո, որևէ կերպ չի կարևորվում ոչ սթափ վիճակում տրանսպորտային միջոցը վարելու դեպքի ապացուցման գործընթացում, և այդ փաստը դուրս է ոչ սթափ վիճակում տրանսպորտային միջոցը վարելու համար անձին պատասխանատվության ենթարկելու համար անհրաժեշտ ապացուցման առարկայի շրջանակից:

Ոչ սթափ վիճակում տրանսպորտային միջոցը վարելու համար անձին պատասխանատվության ենթարկելու համար անհրաժեշտ ապացուցման առարկան ներառում է.

- տրանսպորտային միջոցը վարելու փաստը, և

- Թիվ 277-Ն որոշմամբ հաստատված ձևին (համաձայն թիվ 2 հավելվածի) համապատասխան կազմված՝ բուժհաստատության կողմից վարորդի սթափության վիճակի զննության արձանագրությունը կամ նույն որոշման 1.1-ին կետով սահմանված պահանջներին համապատասխանող տեխնիկական միջոցով կազմված՝ վարորդի սթափության վիճակի զննության արձանագրությունը, որոնք արձանագրում են զննության պահին առկա սթափության վիճակը՝ անկախ ակտիվոր, թմրամիջոցը կամ հոգեմետ նյութն օգտագործելու պահից:

Վճռաբեկ դատարանի իրավական դիրքորոշումների կիրառումը սույն գործի փաստերի նկատմամբ.

Վճռաբեկ դատարանն արձանագրում է, որ սույն վարչական գործը հարուցվել է Անդրանիկ Առաքելյանի կողմից ներկայացված վիճարկման հայցի հիման վրա, որով վերջինս պահանջել է անվավեր ճանաչել Ծառայության 27.06.2024 թվականի թիվ 8180422118 որոշումը:

Դատարանի 28.02.2025 թվականի վճռով հայցը բավարարվել է այն պատճառաբանությամբ, որ. «(...) Հայցվորի կողմից մեքենան ոչ սթափ վիճակում վարելու փաստը կարող է հաստատվել վարչական իրավախախտման վերաբերյալ արձանագրությամբ, վարչական ակտի կայացման համար հիմք հանդիսացած վարորդի սթափության վիճակի զննության վերաբերյալ արձանագրությամբ և սույն գործի համար ապացույց հանդիսացող տեսանյութով: Ըստ այդմ, Դատարանն արձանագրում է, որ Պատասխանողի կողմից որպես Որոշման հիմք հանդիսացող ապացույց՝ ներկայացվել են վարչական իրավախախտման վերաբերյալ 16.06.2024 թվականի արձանագրությունը, Jupiter X/RP թիվ 91101037 գործարանային արտադրության սարքի միջոցով կատարված Հայցվորի սթափության վիճակի զննության արձանագրությունը, որոնց ուսումնասիրության արդյունքում Դատարանը գալիս է այն եզրահանգման, որ Հայցվորի կողմից մեքենան ոչ սթափ վիճակում վարելու փաստը չի հաստատվում: Մասնավորապես, Դատարանն արձանագրում է, որ վարչական իրավախախտման վերաբերյալ արձանագրության «Վարչական իրավախախտում կատարած անձի բացատրությունը, դիտողությունը, ստորագրությունը» տողի դիմաց առկա է Հայցվորի գրավոր նշումը՝ «ես վթարից վախենալով գնացել եմ փուն 2 բաժակ կոնյակ եմ խմել վոր ստրեսից դուրս գամ», ինչպես նաև առկա է ստորագրություն: Այսինքն՝ արձանագրության մեջ կատարված գրառմամբ Հայցվորը փաստացի չի ընդունել այն հանգամանքը, որ ոչ սթափ վիճակում վարել է տրանսպորտային միջոցը:

Բացի այդ, Դատարանը հարկ է համարում արձանագրել, որ սույն դեպքում Պատասխանողի կողմից չի ներկայացվել պարեկային ծառայողի համազգեստին ամրակցված տեսախցիկով կատարված տեսաձայնագրությունը, որը ևս կարող էր հիմք հանդիսանալ ենթադրյալ իրավախախտման կատարման փաստը պարզելու համար:

(...)

Այսպես, Դատարանը սույն գործի ապացույցների հետազոտման արդյունքում գալիս է եզրահանգման, որ դրանցով չեն հաստատվում սույն գործի լուծման համար էական նշանակություն ունեցող այն փաստը, որ Հայցվորը տրանսպորտային միջոցը վարել է ոչ սթափ վիճակում, քանի որ տրանսպորտային միջոցը Հայցվորի կողմից վարելու փաստը հաստատող բավարար համակցությամբ ապացույցներ գործում առկա չեն, մինչդեռ ապացույցների հետազոտումից հետո գործի ելքը պայմանավորող որևէ փաստի չապացուցված մնալու դեպքում դրա բացասական հետևանքները ՀՀ վարչական դատավարության օրենսսագրքի 29-րդ հոդվածի 1-ին մասի ուժով կրում է այդ փաստի ապացուցման բեռը կրող կողմը, մասնավորապես՝ վիճարկման հայցով ապացուցման բեռը կրում է վարչական մարմինը, որն ընդունել է միջամտող վարչական ակտը՝ դրա համար հիմք ծառայած փաստերի մասով:(...)»:

Վերաքննիչ դատարանի 08.07.2025 թվականի որոշմամբ Ծառայության վերաքննիչ բողոքը մերժվել է և Դատարանի 28.02.2025 թվականի վճիռը թողնվել է անփոփոխ՝ հետևյալ պատճառաբանությամբ. «(...) Վերաքննիչ դատարանը փաստում է, որ տվյալ դեպքում հավաստիության կանխավարկածի սկզբունքից բխում է, որ սույն գործով Ծառայությունն էր պարտավոր ապացուցել, որ Անդրանիկ Առաքելյանը վարել է տրանսպորտային միջոցը՝ գտնվելով ոչ սթափ վիճակում, որպիսի պարտականությունը, սակայն, վերջինս չի կատարել: Մասնավորապես՝ թեև առկա են վարորդի սթափության վիճակի գննության վերաբերյալ արձանագրություն, համաձայն որի՝ Անդրանիկ Առաքելյանը գտնվել է ոչ սթափ վիճակում և վարչական իրավախախտման վերաբերյալ արձանագրություն, համաձայն որի՝ Անդրանիկ Առաքելյանը տրանսպորտային միջոցը վարել է՝ գտնվելով ոչ սթափ վիճակում, այդուհանդերձ նշվածը բավարար չէր կարող լինել վերջինիս Վարչական իրավախախտումների վերաբերյալ ՀՀ օրենսգրքի 126-րդ հոդվածի 5-րդ մասով նախատեսված իրավախախտում վերագրելու համար, քանի որ տրանսպորտային միջոցը ոչ սթափ վիճակում Անդրանիկ Առաքելյանի կողմից վարելու փաստը հաստատող բավարար համակցությամբ ապացույցներ գործում առկա չեն: Ավելին, ինչպես վերը նշվեց, վարչական իրավախախտման վերաբերյալ արձանագրության՝ վարչական իրավախախտում կատարած անձի բացատրությունը, դիտողությունը, ստորագրությունը տողում Անդրանիկ Առաքելյանը կատարել է գրառում «ես վթարից վախենալով գնացել եմ տուն 2 բաժակ կոնյակ եմ խմել վոր ստրեսից դուրս գամ», որպիսի տեղեկությունը բոլոր դեպքերում պետք է համարվեր հավաստի, քանի դեռ վարչական մարմինը հակառակը չի ապացուցել:

Այսպիսով, Վերաքննիչ դատարանն արձանագրում է, որ սույն դեպքում հայցվորին վարչական պատասխանատվության ենթարկելու համար պարտադիր պայման է հանդիսանում Վարչական իրավախախտումների վերաբերյալ ՀՀ օրենսգրքի 126-րդ հոդվածի 5-րդ մասով վարչական իրավախախտման օբյեկտիվ կողմի դրսևորումը, այն է՝ տրանսպորտային միջոցը ոչ սթափ վիճակում վարելը, մինչդեռ գործի նյութերով չի հաստատվում Անդրանիկ Առաքելյանի կողմից տրանսպորտային միջոցը ոչ սթափ վարելու փաստը:(...)»:

Վերոգրյալ իրավական դիրքորոշումների լույսի ներքո անդրադառնալով Վերաքննիչ դատարանի պատճառաբանությունների հիմնավորվածությանը՝ Վճռաբեկ դատարանն արձանագրում է հետևյալը.

Սույն գործի փաստերի համաձայն՝ պարեկային ծառայող Է. Մելքոնյանը 16.06.2024 թվականին կազմել է վարչական իրավախախտման վերաբերյալ արձանագրություն, ըստ որի՝ Անդրանիկ Առաքելյանը ժամը 19:45-ին, ք. Վանաձոր, ՄՅ-ում «Մերսեդես» մակնիշի 01KX063 հաշվառման համարանիշի տրանսպորտային միջոցը վարել է ոչ սթափ վիճակում: Որպես խախտված իրավական նորմ՝ նշվել է ՃԵԱԱՄՕ-ի 24-րդ հոդվածի 7-րդ մասի «ա» ենթակետը: Արձանագրության մեջ «Վարչական իրավախախտում կատարած անձի բացատրությունը, դիտողությունը, ստորագրությունը» տողում առկա է հայցվորի գրառումը՝ «ես վթարից վախենալով գնացել եմ տուն 2 բաժակ կոնյակ եմ խմել որ ստրեսից դուրս գամ», իսկ «Արձանագրությանը ծանոթացա, իմ իրավունքների ու պարտականությունների մասին քաղվածքը և խախտման քննարկման վայրի ու ժամանակի վերաբերյալ ծանուցումը ստացա» տողում առկա է հայցվորի ստորագրությունը և ազգանունը:

Պարեկային ծառայող Է. Մելքոնյանի կողմից 16.06.2024 թվականին, ժամը 19:20-ին կազմվել է նաև «Նյութական վնասով ճանապարհատրանսպորտային պատահարի մասին» արձանագրությունը, ըստ որի՝ վարորդներ Անդրանիկ Առաքելյանի և Սլավա Սլոյանի մասնակցությամբ ճանապարհատրանսպորտային պատահարը տեղի է ունեցել 16.06.2024 թվականին ժամը 17:55-ին Արմավիր մարզի, Մարգարա-Վանաձոր ՄՅ ավտոճանապարհին:

Ծառայության 27.06.2024 թվականի վարչական իրավախախտման գործով թիվ 8180422118 որոշմամբ Անդրանիկ Առաքելյանը ենթարկվել է վարչական պատասխանատվության Վարչական իրավախախտումների վերաբերյալ ՀՀ օրենսգրքի 126-րդ հոդվածի 5-րդ մասով նախատեսված իրավախախտման համար և զրկվել է տրանսպորտային միջոցը վարելու իրավունքից 1 տարի ժամկետով:

Վարչական վարույթի նյութերում առկա է սթափության վիճակի զննության թիվ 00978 արձանագրությունը, որի համաձայն՝ Jupiter X/RP 91101037 գործարանային համարի ալկոտեստերի միջոցով կատարված զննման արդյունքում վարորդի մոտ հայտնաբերված ալկոհոլի պարունակությունը կազմել է 0,387 մգ/լ: Թիվ 00978 արձանագրությունը համապատասխանում է Թիվ 277-Ն որոշման թիվ 4 հավելվածի 4-րդ կետի պահանջներին՝ բովանդակելով տեխնիկական միջոցի համարը՝ 91101037, տեխնիկական միջոցի վերջին ստուգաչափման օրը, ամիսը, տարեթիվը՝ 10.10.2023 թվական, սթափության վիճակի զննության օրը, ամիսը, տարեթիվը, ժամը՝ 16.06.2024 թվական, ժամը՝ 19:11:17, ալկոհոլի պարունակությունը՝ 0.387 մգ/լ, վարորդի անունը, ազգանունը՝ Անդրանիկ Առաքելյան, տրանսպորտային միջոցի հաշվառման համարանիշը՝ 01KX063, սթափության վիճակի զննություն իրականացնող տեսուչի ազգանունը՝ Մելքոնյան, կրծքանշանի համարը՝ 11781: Արձանագրությունն ստորագրված է պարեկային ծառայող Մելքոնյանի կողմից:

Վճռաբեկ դատարանն արձանագրում է, որ սույն դեպքում հայցվորին Վարչական իրավախախտումների վերաբերյալ ՀՀ օրենսգրքի 126-րդ հոդվածի 5-րդ մասի հիմքով

վարչական պատասխանատվության ենթարկելու համար անհրաժեշտ փաստակազմի պարտադիր տարրերից մեկի առկայությունը՝ մեկ լիտր արտաշնչած օդի մեջ 0.5 միլիգրամը գերազանցող մաքուր ալկոհոլի պարունակության փաստը հաստատվում է սահմանված պահանջներին համապատասխանող՝ վարորդի սթափության վիճակի զննության տեխնիկական միջոցով կազմված՝ վարորդի սթափության վիճակի զննության թիվ 00978 արձանագրությամբ:

Ինչ վերաբերում է ճանապարհատրանսպորտային պատահարից հետո ալկոհոլի օգտագործման վերաբերյալ հայցվորի փաստարկին, ապա Վճռաբեկ դատարանը սույն գործի փաստերի նկատմամբ կիրառելով վերոհիշյալ իրավական դիրքորոշումները, արձանագրում է, որ Օրենսգրքի 126-րդ հոդվածի 9-րդ մասին համապատասխան կարևորվում է միայն սթափության վիճակի զննման պահին հայցվորի մոտ հայտնաբերված ալկոհոլի պարունակությունը՝ անկախ նրանից, թե ալկոհոլի օգտագործումը փաստացի տեղի է ունեցել մինչև ճանապարհատրանսպորտային պատահարը, թե դրանից հետո՝ մինչև անձի սթափության վիճակի զննություն անցկացնելը: Հետևաբար, Օրենսգրքի 126-րդ հոդվածի 5-րդ մասով ամրագրված իրավախախտման դեպքի առկայության ապացուցման նպատակի համար չի կարևորվում ալկոհոլի օգտագործման պահի բացահայտումը, ուստի այդ փաստը դուրս է քննարկվող զանցակազմի օբյեկտիվ կողմի ապացուցման առարկայից:

Ինչ վերաբերում է տրանսպորտային միջոցը հայցվորի կողմից վարելու փաստին, ապա Վճռաբեկ դատարանն արձանագրում է, որ այդ փաստը հայցվորի կողմից չի վիճարկվել և ՀՀ վարչական դատավարության օրենսգրքի 30-րդ հոդվածի 4-րդ մասի ուժով հանդիսանում է ապացուցման կարիք չունեցող փաստ: Չի վիճարկվում նաև Օրենսգրքի 126-րդ հոդվածի 1-ին մասի 1-ին կետով նախատեսված արարքը մեկ տարվա ընթացքում կրկին կատարելու փաստը:

Այսպիսով՝ Վճռաբեկ դատարանն արձանագրում է, որ հաստատված է համարվում Անդրանիկ Առաքելյանի կողմից Օրենսգրքի 126-րդ հոդվածի 5-րդ մասով նախատեսված խախտումը կատարելու փաստը, որպիսի պայմաններում վերջինս իրավաչափորեն է ենթարկվել վարչական պատասխանատվության, ինչն անտեսվել է ստորադաս դատարանների կողմից Օրենսգրքի 126-րդ հոդվածի 9-րդ մասի սխալ մեկնաբանության ու կիրառման արդյունքում:

Այսպիսով, սույն վճռաբեկ բողոքի հիմքի առկայությունը Վճռաբեկ դատարանը դիտում է բավարար՝ ՀՀ վարչական դատավարության օրենսգրքի 150-րդ, 151-րդ և 163-րդ հոդվածների ուժով Վերաքննիչ դատարանի որոշումը բեկանելու համար:

Միաժամանակ Վճռաբեկ դատարանը գտնում է, որ սույն գործով անհրաժեշտ է կիրառել ՀՀ վարչական դատավարության օրենսգրքի 169-րդ հոդվածի 1-ին մասի 3-րդ կետով սահմանված՝ ստորադաս դատարանի դատական ակտը փոփոխելու Վճռաբեկ դատարանի լիազորությունը հետևյալ հիմնավորմամբ.

«Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի (այսուհետ՝ Կոնվենցիա) 6-րդ հոդվածի համաձայն՝ յուրաքանչյուր ոք ունի ողջամիտ ժամկետում իր գործի քննության իրավունք: Սույն գործով վեճի լուծումն էական նշանակություն ունի գործին մասնակցող անձանց համար: Վճռաբեկ

դատարանը գտնում է, որ գործը ողջամիտ ժամկետում քննելը հանդիսանում է Կոնվենցիայի վերոգրյալ հոդվածով ամրագրված՝ անձի արդար դատաքննության իրավունքի տարր: Հետևաբար գործի անհարկի ձգձգումները վտանգ են պարունակում նշված իրավունքի խախտման տեսանկյունից: Տվյալ դեպքում Վճռաբեկ դատարանի կողմից ստորադաս դատարանի դատական ակտը փոփոխելը բխում է արդարադատության արդյունավետության շահերից, քանի որ սույն գործով վերջնական դատական ակտ կայացնելու համար նոր հանգամանք հաստատելու անհրաժեշտությունը բացակայում է:

Դատական ակտը փոփոխելիս Վճռաբեկ դատարանը հիմք է ընդունում սույն որոշման պատճառաբանությունները, ինչպես նաև գործի նոր քննության անհրաժեշտության բացակայությունը:

5. Վճռաբեկ դատարանի պատճառաբանությունները և եզրահանգումները դատական ծախսերի բաշխման վերաբերյալ.

ՀՀ վարչական դատավարության օրենսգրքի 56-րդ հոդվածի համաձայն՝ դատական ծախսերը կազմված են պետական տուրքից և գործի քննության հետ կապված այլ ծախսերից:

ՀՀ վարչական դատավարության օրենսգրքի 60-րդ հոդվածի 1-ին մասի համաձայն՝ կողմը, որի դեմ կայացվել է վճիռ, կամ որի բողոքը մերժվել է, կրում է Հայաստանի Հանրապետության դատական դեպարտամենտի՝ վկաներին և փորձագետներին վճարած գումարների հատուցման պարտականությունը, ինչպես նաև մյուս կողմի կրած դատական ծախսերի հատուցման պարտականությունը այն ծավալով, ինչ ծավալով դրանք անհրաժեշտ են եղել դատական պաշտպանության իրավունքի արդյունավետ իրականացման համար: Դատական պաշտպանության այն միջոցի հետ կապված ծախսերը, որ իր նպատակին չի ծառայել, դրվում են այդ միջոցն օգտագործած կողմի վրա, անգամ եթե վճիռը կայացվել է այդ կողմի օգտին:

Սույն գործով նկատի ունենալով, որ Ծառայությունը վերաքննիչ և վճռաբեկ բողոքների համար վճարել է համապատասխանաբար՝ 20.000 ՀՀ դրամ և 30.000 ՀՀ դրամ, իսկ վճռաբեկ բողոքը ենթակա է բավարարման, Վճռաբեկ դատարանը գտնում է, որ Ծառայության կողմից նախապես վճարված պետական տուրքի գումարը, ՀՀ վարչական դատավարության օրենսգրքի 60-րդ հոդվածի հիման վրա, ենթակա է հատուցման Անդրանիկ Առաքելյանի կողմից:

Ելնելով վերոգրյալից և ղեկավարվելով ՀՀ վարչական դատավարության օրենսգրքի 169-171-րդ հոդվածներով, 172-րդ հոդվածի 1-ին մասով՝ Վճռաբեկ դատարանը

Ո Ր Ո Շ Ե Ց

1. Վճռաբեկ բողոքը բավարարել: Բեկանել ՀՀ վերաքննիչ վարչական դատարանի 08.07.2025 թվականի որոշումը և փոփոխել այն՝ հայցը մերժել:

2. Անդրանիկ Առաքելյանից հօգուտ ՀՀ ՆԳՆ ոստիկանության պարեկային ծառայության բռնագանձել 20.000 ՀՀ դրամ՝ որպես վերաքննիչ բողոքի համար վճարված

պետական տուրքի գումար, 30.000 ՀՀ դրամ՝ որպես վճարելի բողոքի համար նախապես վճարված պետական տուրքի գումար:

3. Որոշումն օրինական ուժի մեջ է մտնում կայացման պահից, վերջնական է և բողոքարկման ենթակա չէ:

Նախագահող _____ **Հ. ԲԵԴԵՎՅԱՆ**

Զեկուցող _____ **Լ. ՀԱԿՈԲՅԱՆ**

_____ **Ա. ԹՈՎՄԱՍՅԱՆ**

_____ **Ռ. ՀԱԿՈԲՅԱՆ**

_____ **Ք. ՄԿՈՅԱՆ**